

四明叢書

張宗祥

正義曰朱注邦有道不能有爲邦無道不能獨善而但知食祿皆可恥也憲之狷介其於邦無道穀之可恥固知之矣至於邦有道穀之可恥則未必知也故夫子因其問而并言之以廣其志使知所以自勉而進於有爲也蒙案孔注謂邦有道當食其祿皇疏云將言可恥者先舉不恥者是以上句讀斷而以下句專言邦無道穀之可恥核之泰伯篇邦有道貧且賤焉恥也邦無道富且貴焉恥也正與此注相合然反覆詳繹此章語氣總不如朱注之意味深長何則以

邦無道穀之可恥原思固已知之也此章語意三句
一直滾下不重有道無道而可恥專在一穀字蓋有
道之邦固宜食祿乃不問有道無道而尸位素餐惟
知哺啜處則不能有守出則不能有爲唯阿取容弱
穴伴食可恥孰甚焉曾子制言中曰君子進則能達
退則能靜豈貴其能達哉貴其有功也豈貴其能靜
哉貴其能守也原思狷介之士有守非其所難而有
爲或其所短韓詩外傳一云原憲居魯環堵之室匡
坐而弦歌子貢乘肥馬衣輕裘而往見之原憲楮冠

藜杖而應門正冠則纓絕振襟則肘見納履踵決子貢曰先生何病也原憲仰而應之曰憲聞之無財之謂貧學而不能行之謂病憲貧也非病也若夫希世而行比周而友學以爲人教以爲己仁義之匿車馬之飾衣裘之麗憲不忍爲之也子貢逡巡而去原憲乃徐步曳杖歌商頌而反聲淪於天地如出金石天子不得而臣也諸侯不得而友也史記弟子傳所載略同云孔子卒原憲亡在草澤中家語云原憲清靜守節貧而樂道孔子爲魯司寇嘗爲孔子宰孔子卒

後退隱於衛是憲本狷介有守之士而得聞聖誨從事斯語出處遂合於聖人其爲宰辭九百之粟或恐不能有爲而貽徒穀之恥故爲此過介之行歟然則此章當從朱注以恥也統承有道無道本經此例甚多知之爲知之不知爲不知是知也大德不踰閑小德出入可也皆以也字統承之例也

孔注云云疏曰穀祿爾雅釋言文穀祿同在侯部又一義之引申孟子穀祿不平趙注穀所以爲祿也周禮太宰祿以馭其士國家以功詔祿君子受祿不誣

邦有道之穀本無可恥然時可有爲士當自勉或謂
有道時無無功受祿之人吾不敢信也

克伐怨欲不行焉可以爲仁矣

注馬曰克好勝人也伐自伐其功也怨忌小怨

也欲貪

欲也

史記弟子傳三國志鍾離牧傳注引矣字作乎上有
子思曰三字因與聖孫字同故記者刪此三字也

正義曰大全胡氏云分言則四事對舉互言則克伐
者因己所有而生氣盈也怨欲者因己所無而生氣
歉也推本言之又皆由有己而生也饒氏魯曰病根
在一欲字有所欲則貪多而求勝遂其所欲則誇伐

不遂其所欲則怨恨蒙案自孔子國以無欲注仁者
靜王子雍以無欲注剛近仁宋儒遂以無欲言仁謂
人欲之淨盡卽天理之渾全而說乃流於老佛之絕
欲抑知欲可寡不可無欲可節不可絕卽克伐怨之
三字亦有善不善之分而不得以一欲字概之而盡
絕之也克之善者訓能訓堪克念作聖克己復禮法
言云勝己之私之謂克好仁者無以尙惡不仁者不
使加要卽此好勝之一念所推也克之不善者訓責
訓殺刑期無刑殺以止殺又仁者不得已之苦心唐

書刑法志曰仁者制亂而弱者縱之是克者非仁不
克亦非所以爲仁也陸希聲左傳通例曰聲罪致討
曰伐弔民伐罪伐暴安良伐之善者也因而戰功曰
伐自稱其功亦曰伐禮表記曰無欲而好仁無畏而
惡不仁者天下一人而已故三代以下惟恐不好名
呂覽察微篇子貢贖魯人於諸侯來而讓不取其金
孔子曰自今以往魯人不贖人矣子路拯溺者其人
拜之以牛子路受之孔子曰魯人必拯溺者矣汪引
淮南記曰子貢讓而止善子路受而勸德夫不受其

金不伐其功也而贖人之路絕是伐者非仁不伐亦非所以爲仁也詩可以怨三百篇皆仁人孝子之心吳季札謂小雅怨而不言太史公謂小雅怨諱而不亂孟子曰小弁之怨親親也凱風親之過小者也不小弁親之過大者也親之過小而怨是不可磯也親之過大而不怨是愈疏也又曰舜號泣於旻天於父母怨慕也公明高以孝子之心爲不若是忍是怨者非仁不怨亦非所以爲仁也至於欲則更有不可盡絕者子曰我欲仁斯仁至矣己欲立而立人已欲達

而達人己所不欲勿施於人此卽絜矩之道欲之善者也董子保位權篇故聖人之制民使之有欲不得過節使之敦朴不得無欲無欲有欲各得以足而君道得矣韓詩外傳五曰目欲視好色耳欲聽宮商鼻欲嗅芬香口欲嗜甘旨其身體四肢欲安而不作衣欲被文繡而輕煖此六者民之六情也失之則亂從之則穆故聖王之教其民矣必因其情而節之以禮必從其欲而制之以義義簡而備禮易而法去情不遠故民之從命也速大戴踐祚記曰義勝欲者從欲

勝義者凶法言脩身篇曰由於情欲入自禽門由於
禮義入自人門亦謂情欲不可勝禮義而非任禮義
以絕情欲也是多欲非仁無欲亦非所以爲仁也戴
氏東原曰孟子養心莫善於寡欲明乎欲不可無也
寡之而已人之生也莫病於無以遂其生欲遂其生
亦遂人之生仁也欲遂其生至於戕人之生而不顧
者不仁也不仁實始於欲遂其生之心使其無此欲
必無不仁矣然使其無此欲則於天下之人生道窮
促亦將漠然視之已不必遂其生而遂人之生無是

情也詩曰民之質矣日用飲食記曰飲食男女人之
大欲存焉聖人治天下體民之情遂民之欲而王道
備堯舜之憂四海困窮文王之視民如傷何一非爲
民謀其人欲之事惟順而導之使歸於善舉凡民之
飢寒愁怨飲食男女常情隱曲之感相生相養之道
無一不出於欲孟子以耳目口鼻四肢之於聲色臭
味安佚爲性也而繼之曰有命焉命者限制之名言
性之欲之不可無節也節而不過則依乎天理非以
天理爲正人欲爲邪也天理者節其欲而不窮人欲

也是故欲不可窮非不可有有而節之使無過情無
不及情可謂之非天理乎焦氏理堂曰孟子稱公劉
好貨太王好色與百姓同之使有倉積而無怨曠此
卽己立立人已達達人之事必屏妃妾減服食而於
百姓之飢寒此離漠不關心則堅瓠也故克伐怨欲
不行苦心潔身之士孔子所不取董子論仁曰其事
易易傳云易則易知簡則易從不如因己之欲推以
知人之欲卽因己之不欲推以知人之不欲絜矩取
譬事不難而仁已至矣絕己之欲而不能通天下之

志非所以爲仁也

馬注云云疏曰說文克肩也以肩任物能勝任也故爾雅釋言克能也洪範剛克柔克馬注禮器我戰則克鄭注詩小宛飲酒溫克毛傳皆訓勝左莊十一年傳得雋曰克亦勝也故注云好勝人左傳莊廿八年且旌君伐成十六年驟稱其伐杜注伐功也襄十二年小人伐其技以馮君子注自稱其能爲伐僞禹謨汝惟不伐天下莫與汝爭功老子不自伐故有功僞書所本也賈子道術篇功遂自卻謂之退反退爲伐

故注云自伐其功卽自稱其功也說文怨恚也怨乎
皇疏恨也故朱注云忿恨是也輔氏廣謂忿見於外
恨藏於中忿而結恨於心也詩曰忘我大德思我小
怨賈子道術篇施行得理謂之德反德爲怨故注云
忌小怨詩瞻卬維予胥忌檀弓爲懿伯之忌晉語小
人忌而不思傳注忌皆訓怨說文欲貪欲也馬注所
本

子曰可以爲難矣仁則吾不知也

注包曰此四者行之難者未足以爲仁也

正義曰朱子外注引程子曰人而無克伐怨欲惟仁

者能之有之而能制其情使不行斯亦難能也謂之
仁則未也或曰四者不行固不得爲仁矣然亦豈非
所謂克己之事求仁之方乎曰克己去私以復乎禮
則私欲不留而天理之本然得矣若但制而不行則
是未有拔去病根之意而容其潛藏隱伏於胸中也
豈克己求仁之謂哉陸氏稼書曰爲仁必如夫子所
以告顏冉者一從敬恕積漸而來一從克復勇猛而
入皆是拔去病根且兼培元氣之法以不行對縱欲
者言則不行爲難以不行對克復敬恕言則不行又

不足爲難矣。蒙案史記弟子傳引子思問恥子曰國有道穀國無道穀恥也。下直接子思曰克伐怨欲不行焉可以爲仁乎。故皇邢疏本皆合兩節爲一章。蓋原思本狷介之士。一聞邦有道穀邦無道穀之可恥以爲世之干祿者大抵非好勝而誇功卽貪求而怨望。惟絕去克伐怨欲使之淨盡庶可以免恥而爲仁。故爲宰斯有九百之辭而問仁欲除四者之累。其所謂不行者自是決斷之詞無異老佛之絕欲。乃夫子以爲難而未許其仁者猶臧三耳之說甚難而實非。